

19/07/2002

Presiden Iran lawat Malaysia 21 Julai

KUALA LUMPUR, Khamis - Presiden Iran, Seyed Mohammad Khatami akan mengadakan lawatan negara tiga hari ke Malaysia bermula 21 Julai ini.

Menurut kenyataan Wisma Putra yang dikeluarkan di sini hari ini, lawatan itu yang pertama bagi Khatami ke negara ini dan ia atas jemputan Yang di-Pertuan Agong.

Lawatan terakhir oleh seorang ketua negara dari Iran dilakukan Presiden Akhbar Hashem Rafsanjani pada 1994.

"Objektif lawatan Khatami ialah memperkukuh dan meningkatkan hubungan kedua-dua negara," menurut kenyataan itu.

Presiden Iran itu diiringi isterinya, Zohreh Khatami Sadeghi dan delegasi 91 anggota termasuk lima menteri, lima timbalan menteri dan pegawai kerajaan.

Program lawatan itu termasuk majlis menghadap Yang di-Pertuan Agong Tuanku Syed Sirajuddin Syed Putra Jamalullail dan Raja Permaisuri Agong Tuanku Fauziah, majlis makan malam dianjurkan baginda berdua dan satu pertemuan bersama Perdana Menteri, Datuk Seri Dr Mahathir Mohamad.